

SUL CYFFREDIN 22

GALARNAD 1:1-6; SALM 37:1-9;
2 TIMOTHEUS 1:1-14; LUC 17:5-10

● Gweddi agoriadol

Boed i Dduw, a'n dygodd ni i'r lle hwn,
dderbyn yr emynau a'r gweddïau a ddywedwn yma,
a boed i'r cariad sy'n ein huno yn ei ras
fod yn fendith i ni drwy'r dydd.

● Moliant

Ynot ti, Arglwydd, yr ymddiriedwn;
yn dy gariad llawenhawn,
achos does neb arall
y gallwn droi ato,
sy'n gwybod ein hanghenion
cyn i ni ofyn,
yn darllen ein calonnau
ac ateb ein gofyn.

Ynot ti, Arglwydd, yr ymddiriedwn;
ar dy heddwch y dibynnwn,
achos does neb arall
y gallwn droi ato,
sy'n tawelu ein heneidiau,
yn dwyn rhyddhad,
a, phan fyddwn wedi blino,
yn cael gorffwys yn ei freichiau.

● **Cyffes**

Arglwydd, down â'n momentau 'bron â bod' atat.

Pan gododd y cyfle i ddwyn dy enw

i mewn i sgwrs a ninnau bron â gwneud.

Pan gawsom gyfle i helpu un mewn angen,

a bron â llwyddo.

Pan ffromwyd ni gan anghyfiawder,

a'n hysbryd yn fflam i wneud gwahaniaeth,

bu bron i ni wneud.

Pan glywsom dy alwad i ddilyn llwybr arall,

a bron â gwneud.

Maddau ein hofnusrwydd, ein harafwch

i fyw y bywyd a arddelwn.

Down â'n momentau 'bron â bod'.

Drwy dy Ysbryd nertha ein bywydau,

er mwyn i'th enw gael ei ogoneddu

a'n 'bron â bod' yn troi yn 'wastad'.

● **Diolch**

Am rodd ffydd,
sy'n gweld heibio'r foment bresennol
ac yn edrych at dy dragwyddoldeb,
diolchwn i ti.

Am rodd ffydd,
bach fel hedyn mwstard,
 ond gyda'r fath rym
yn y symlrwydd hwnnw,
diolchwn i ti.

Am rodd ffydd,
a roir i'r rhai sydd ond yn gofyn,
eu calon ar agor yn ddiymhongar,
diolchwn i ti.